

PDR no a wordo disolvi anto lo keda existi

ORANJESTAD - Partido Democracia Real (PDR) no a wordo resolvi anto lo keda existi segun lider y fundado Sr. Andin Bikker.

Partido Democracia Real: "PDR ta existi y lo sigui existi!"

Diamars mainta Sr. Andin Bikker a informa via un comunicado cu PDR a ripara tin cierto grupo den partidonan tradicional ta spanta cu e union di PDR y POR. Segun PDR, esaki ta duna impresion cu nan no a comprende of no kier comprende e protocol anto ta plama informacion incorrecto cu PDR lo a wordo disolvi. Segun Sr. Bikker, PDR a drenta den un acuerdo den forma di un protocol pa uni forza den e eleccion venidero na 2017. PDR

como organisacion ta forma parti integral di esaki unda tin por ehempel e derecho pa di su banda trece y propone candidato conhunto y yuda cu formacion y decisionnan cu ta wordo tuma conhuntamente. PDR ta keda miembro di International Democrat Union (IDU) y tin representacion den Parlamento.

Na Venezuela por ehempel, un protocol di union a wordo aplica den e ultimo eleccion pa Parlamento (Asamblea) caminda partidonan existente den oposicion (manera partido ruman PDR den IDU, Proyecto Venezuela) a uni bao di un solo capa. Esaki yama Mesa di Unidad anto asina a logra gana eleccion di 6 di december 2015.

PDR ta lamenta cu oponen-
tenan cu ta sostene parti-

donan tradicional ta purba mal informa pa trata na crea discordia. Segun Sr. Bikker: "Obviamente nan ta preocupa cu e potencial enorme di e union PDR/POR den e plataforma Forsa Nobo, sino nan no lo ta worry asina tanto cu e union historico aki."

Entrega di lista

Dos organisacion, esta PDR y POR lo coopera a base di e protocol "Forsa Nobo" pa presenta un solo lista. Sr. Bikker ta bisa: "E numeracion riba lista lo wordo determina y anuncia, mescos cu ta usual cerca tur otro partido, dia di entrega e lista final na augustus 2017. Mesa di Unidad na Venezuela ta un ehempel, segun mi partido de la union na Colombia tambe. Na Aruba aña 1984, Ruba a uni forza cu AVP."

